

Broj: 01-02-3-906/17

Sarajevo, 21.07.2017. godine

Z A P I S N I K
21. REDOVNE SJEDNICE PREDSTAVNIČKOG DOMA PARLAMENTA FEDERACIJE
BiH, održane 16. i 17.05.2017. godine

Sjednica je počela u 10.39.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, članove Vlade Federacije BiH, goste kao i predstavnike akreditiranih medijskih kuća koji prate rad sjednice.

Prije početka rada odata je počast nastradalim u avionskoj nesreći u Mostaru.

Odsustvo sa sjednice opravdali su: Azra Hadžiahmetović, Alma Arnaut, Ilhan Bušatlić, Emina Mutap i Zdravko Kuzman.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Zapisnici tematskih sjednica "Problem iseljavanja stanovništva sa područja Federacije BiH" i "Problem zagađenosti zraka u Federaciji BiH" usvojeni su bez primjedbi a zapisnik 18. vanredne sjednice nije usvojen.

Prešlo se na izjašnjanje o pokrenutim inicijativama.

Dževad Adžem pokrenuo je inicijativu za donošenje zaključka, kojim će se ministar za pitanja boraca i invalida odbrambeno-oslobodilačkog rata obavezati, da zaključno sa 31.07.2017. godine, u parlamentarnu proceduru uputi pet zakona iz ove oblasti a što nije usvojeno (21 glas za, sedam glasova protiv i uz 25 uzdržanih glasova).

Safet Kešo predložio je zaključak, kojim se zadužuje Vlada Federacije BiH da putem resornih ministarstava koja imaju isključivu ili sa kantonima zajedničku ustavnu nadležnost u relevantnim oblastima djelovanja, izvrši provjeru postojanja kolizija u zakonskim propisima kantonalnog i federalnog nivoa, te definira Plan programskih i operativnih mjera za otklanjanje takvog stanja sa svim potrebnim elementima, a što pojedinačnim izjašnjanjem nije usvojeno (48 glasova za, jedan glas protiv i uz 12 uzdržanih glasova).

Jasmin Kadić pokrenuo je inicijativu prema Vladi Federacije BiH da se donese Odluka prema kojoj će biti smijenjeni svi izvršni direktori uprava javnih preduzeća u većinskom vlasništvu Federacije BiH koja su negativno poslovala, a što pojedinačnim izjašnjanjem nije usvojeno (38 glasova za, tri glasa protiv i uz 31 uzdržani glas).

Zastupnička pitanja

Mahir Mešalić traži da mu se dostavi izvještaj o poslovanju Elektroprivrede BiH i HZHB za prvih šest mjeseci 2017. godine, sa ukupnim prihodima i rashodima, te broj novouposlenih i na kojim pozicijama. Također, postavlja pitanje - po kojoj cijeni se isporučuje struja iz elektroprivreda u firmu Aluminij Mostar.

Podsjetio je premijera Federacije na Inicijativu vezanu za proglašenje Dana žalosti 25.maja koja je usvojena u Domu, a nije zaživjela.

Damir Mašić prvo pitanje uputio je federalnom ministru pravde – zašto ministar nije donio podzakonske propise o naknadi troškova krivičnog postupka i visini paušalnog iznosa za što je bio obavezan da uradi, na osnovu člana 206. Zakona o krivičnom postupku Federacije BiH? Također, traži i broj predmeta u kojim se na godišnjem nivou isplaćuju ovi troškovi i naknade i koliki je iznos novčanih sredstava koji se izdvajaju iz federalnog i kantonalnih budžeta za ove najmanje na godišnjem nivou?

Drugo pitanje uputio je Vladi Federacije BiH – kada će Vlada konačno osigurati primjenu Zakona o suzbijanju korupcije i organiziranog kriminala u Federaciji BiH?

Naredno pitanje također je upućeno Vladi Federacije BiH – kada će Vlada u parlamentarnu proceduru uputiti Zakon o uvezivanju staža?

Sljedeće pitanje vezano je za usvojenu Rezoluciju u Predstavničkom domu Parlamenta Federacije BiH o osudi inicijativa za federalizacijom države i entiteta sa ciljem etno-nacionalnih podjela i snaženja separatističkih tendencija, te da li je po proceduri upućena nadležnim tijelima u državi?

Posljednje pitanje vezano je za Ministarstvo za rad i socijalna pitanja i zaštitu potrošača Republike Austrije, koji pokušavaju kontaktirati naš Federalni zavod za zapošljavanje kako bi im dostavili određene podatke. Traži od Zavoda da odgovori na upit koji im se bezuspješno mjesecima šalje.

Amra Kunovac pokrenula je inicijativu prema Vladi Federacije BiH da se poveća procenat izdvajanja od ukupnih prihoda ostvarenih na osnovu doprinosa za obavezno zdravstveno osiguranje Fondu solidarnosti i prema istom uplati sva dugovanja.

Pitanje je uputila Federalnom ministarstvu okoliša i turizma – koje aktivnosti je poduzelo da se na nivou kantona i općina u što kraćem roku donesu planovi upravljanja otpadom i da se uspostavi informacioni sistem?

Drugo pitanje - dokle se došlo sa izradom Federalnog plana upravljanja opasnim otpadom, da li su predviđeni kapaciteti za prihvrat opasnog otpada?

Amra Haračić pitanje je uputila Vladi Federacije BiH - u kojoj fazi je realizacija inicijative za pomoć Roditeljskoj kući u Sarajevu?

Easd Bašagić pokrenuo je inicijativu, kojom se zadužuje Javno preduzeće Željeznice Federacije BiH da hitno pristupi elektrifikaciji dijela unske pruge na relaciji Bihać-Bosanski Novi, te osiguraju željeznički putnički saobraćaj na relaciji Bihać - Sarajevo.

Dževad Adžem pitanja uputio je premijeru Novaliću – da li je formirao fond iz kojeg će se finansirati izvozno orijentisana preduzeća i firme Federacije BiH, koja je vrijednost finansijskih sredstava u fondu i na koji način pomaže firmama koje su izvozno orijentisane?

Traži informaciju, kolike su bile investicije u 2014., 2015. i 2016. godini, strukturnu investiciju i u koje privredne grane i oblasti su došle te investicije? Za koliko radnika je Vlada preuzela obaveze uplate doprinosa, o kom iznosu se radi? Komentirao je i premijerov ekspoze kojeg je imao na početku mandata.

Jasmin Kadić izrazio je nezadovoljstvo neusvajanjem inicijative koju je predložio na današnjoj sjednici.

Traži od Vlade Federacije BiH da mu dostavi za 53 preduzeća koja se nalaze u Uredbi o vršenju ovlaštenja na osnovu učešća državnog kapitala u privrednim društvima iz nadležnosti Federacije BiH, izvještaje o poslovanju, a u skladu sa članom 6. Zakona o javnim preduzećima, gdje Skupština preduzeća podnosi općinskim vijećima, skupštinama kantona odnosno Parlamentu Federacije BiH izvještaj o radu i poslovanju javnih preduzeća, najmanje jednom godišnje.

Traži od nadležnog ministarstva da mu dostavi izvještaj o radu Filmskog centra Sarajevo, osvrćući se na odgovor koji je dobio od ministarstva u kojem se navodi da ne mogu dostaviti izvještaj, jer se takav izvještaj ne dostavlja ministarstvu.

Enver Bijedić prvo pitanje uputio je Vladi Federacije BiH - koji federalni odnosno kantonalni organ uprave u skladu sa članom 47. Zakona o udruženjima i fondacijama je nadležan za vršenje nadzora nad zakonitošću rada udruženja i fondacija („Službene novine FBiH“ broj 45/02)?

Šta po službenoj dužnosti preuzima federalni odnosno kantonalni organ uprave kada je u pitanju provođenje odredbi Glave VII i VIII Zakona o udruženjima i fondacijama, nad zakonitošću rada udruženja i fondacija? Da li na nivou kantona ili Federacije postoji tijelo, koje po službenoj dužnosti prati i ažurira podatke koji se tiču udruženja i fondacija osim upisa promjena u Registar na zahtjev samih udruženja? U skladu s tim, podnosi zahtjev za tumačenje odredbi Glave VII i VIII, konkretno člana 43. stav 2. tačka 1. i člana 47. Zakona o udruženjima i fondacijama.

Drugo pitanje uputio je Zavodu za zaštitu i korištenje kulturno-historijskog naslijeđa i prirodnog naslijeđa Tuzlanskog kantona i Ministarstva prostornog uređenja i zaštite okolice

Tuzlanskog kantona – šta je urađeno i šta se namjerava uraditi po pitanju zaštite spomenika prirodnog nasljeđa?

Mira Grgić pitanje je postavila predsjedavajućem i potpredsjedavajućim Predstavničkog doma Parlamenta Federacije BiH - koliko je u posljednjih sedam godina bilo posjeta u Blajburg, a koliko Jasenovac na račun Parlamenta Federacije BiH? Traži da joj se dostavi iznos novčanih sredstava za ta službena putovanja kao i poziv za učešće u pomenutim manifestacijama.

Vesna Švancer postavila je pisanim putem šest pitanja.

Dennis Gratz pitanje je uputio prema Predstavničkom domu Parlamenta Federacije BiH i Zavodu za zapošljavanje – koliko je ljudi skinuto ili se odjavilo sa evidencije nezaposlenih zbog zaposlenja u drugoj državi?

Jozo Bagarić pitanje je uputio Federalnom ministarstvu branitelja – na temelju kojih propisa je organizirana inspekcija u Federalnom ministarstvu branitelja? Također pita – temeljem kojeg člana Zakona o kontroli zakonitosti korištenja prava iz oblasti braniteljsko-invalidske zaštite gospođa Pozderac vrši kontrolu i daje svoje mišljenje na nalaze Instituta za medicinsko vještačenje, zbog već provedenih postupaka od strane Instituta?

Jasmina Zubić prvo pitanje uputila je Zavodu zdravstvenog osiguranja Srednjobosanskog kantona, Hercegovačko-neretvanskog kantona, Zeničko-dobojskog kantona, Bosansko-podrinjskog kantona, Unsko-sanskog kantona i Zapadno-hercegovačkog kantona – da li su kantonalni zavodi u svoje pravilnike o ostvarivanju prava i načinu na ortopedska i druga pomagala uvrstili inzulinsku pumpu kao obavezno i besplatno medicinsko pomagalo dostupno svoj djeci, a u skladu sa članom 33. Zakona o zdravstvenom osiguranju Federacije, a po preporuci Institucije ombudsmena iz prve polovine 2016. godine.

Drugo pitanje uputila je premijeru i Federalnom ministarstvu za boračka pitanja - u kojoj fazi je donošenje Zakona o izmjenama i dopunama Zakona o pravima branilaca i članova njihovih porodica jer je Radna grupa 11.11.2016. podnijela Izvještaj i prijedlog teksta izmjena i dopuna Zakona o prijevremenom povoljnijem penzionisanju branilaca.

Treće pitanje uputila je Federalnom ministarstvu pravde i Uredu za zakonodavstvo – da li je član 2. stavovi 3. i 4. Zakona o izmjenama i dopunama Zakona o radu koji je usvojen na nastavku 19. sjednice Predstavničkog doma 26.04.2017. u koliziji sa članom 1. tačke 1. i 2. Zakona o ministarskim, vladinim i drugim imenovanjima Federacije BiH („Službene novine FBiH“ broj 12/03, 34/03, 65/13). Pitanje je usmjereno na to da se potvrdi da li je bilo neophodno izvršiti izmjene Zakona o radu, kada je u pitanju prijem u javne institucije ili na području Federacije, kad se ima jasno utvrđena procedura Zakonom o vladinim imenovanjima koji se primjenjuje podjednako na svim nivoima kada su u pitanju prijemi u javne institucije.

Ramiz Meša pitanje je uputio Federalnom ministarstvu prostornog uređenja – u kojoj fazi je donošenje Zakona o prodaji stanova na kojima postoji stanarsko pravo?

Drugo pitanje vezano je za imenovanje Emira Đikića za direktora CEFTA Sekretarijata u Briselu.

Jusuf Bubica pitanje je uputio Vladi Federacije BiH i Federalnom ministarstvu finansija, Upravi za indirektno oporezivanje, Ministarstvu transporta, Poreznoj upravi i Vijeću ministara BiH - koliko je do sada skupljeno sredstava od postojećih akciza na gorivo? Koliko iznose prikupljena sredstva za putarine? Ukupno sakupljena sredstva prilikom registracije vozila namjenjena cestama? Ukupno izdvojena nepovratna sredstva iz budžeta na svim nivoima u BiH kao i ostala sredstva iz izvora donatora.

Saša Mitrović pitanje je uputio Federalnom ministarstvu prometa - ako je odluka o povećanju cijena eko testa za registraciju vozila nezakonita, zašto se do sada nije ukinula uredba iako je ustanovljena prije tri mjeseca. Pošto je do sada nezakonito naplaćeno skoro 14 miliona KM, da li će formiranje novih cijena podrazumijevati i povrat novca vozačima koji su platili eko test po većoj cijeni?

Faruk Ćupina pita – kako Vlada tretira pitanje registracije Saveza samostalnih sindikata u registar Udruženja i Fondacija BiH, a pri Ministarstvu pravde BiH, odnosno nepostojanje registrovanog ovlaštenog lica za zastupanje sindikata. Kako Vlada tretira zakonske i podzakonske akte donesene iz oblasti radno pravnog zakonodavstva u Federaciji

te samim tim i predmete iz radnih sporova po osnovu kolektivnih ugovora koji se nalaze pred sudovima u Federaciji BiH?

Sljedeće pitanje uputio je Federalnom ministarstvu prometa i komunikacija, a vezano je za dostavljanje informacije o usklađenosti bosanskohercegovačke legislative u oblasti civilnog zrakoplovstva sa određenim aktima Evropske unije, budući da se tragedija koja je zadesila Mostar skrenula pažnju na sigurnost civilnog zrakoplovstva u Federaciji. Pitanje je upućeno radi bolje informiranosti u navedenoj oblasti te pristupanju izrade potebnih mjera za unapređenje sigurnosti civilnog zrakoplovstva u Federaciji BiH.

Pitanje je uputio Federalnom ministarstvu obrazovanja – da li je uočen povećani trend ispisanja učenika iz srednjih škola na području Federacije.

Nasir Beganović prvo pitanje uputio je premijeru Novaliću i ministru Džindiću – da li je Vlada i ministarstvo razmatralo kvartalni izvještaj Elektroprivrede, te da li su tačne informacije o gubicima i šta Vlada i ministarstvo namjeravaju učiniti po ovom pitanju, te da između ostalog planiraju smijeniti kompletnu upavu, nadzorni odbor, generalnog direktora i sve izvršne direktore, budući da je sramna činjenica da jedna od najprofitabilnijih firmi u BiH posluje sa gubitkom.

Jasna Duraković Hadžimerović na prošloj sjednici uputila je inicijativu Ombudsmenu za ljudska prava i uočila da službe nisu poslale mail svim zastupnicima, tako da nisu mogli vidjeti o čemu se radi, pa pita šta je sa tom Inicijativom.

Drugo pitanje, odnosno kritika upućena je Ministarstvu pravde, jer treći put traži da joj se dostavi Odluka o utemeljenju alimentacionog fonda.

Midhat Karović ponavlja pitanje koje je više puta postavljao - dokle se došlo sa izborom Neovisnog odbora i Odbora za žalbe.

Mirsad Topčagić pitanje je uputio Vladi Federacije BiH – kada će dati saglasnost na imenovanje izvršnog direktora za distribuciju u Javnom preduzeću Elektroprivreda BiH a u cilju omogućavanja potpisivanja ugovora o priključenju na elektrodistributivnu mrežu i ugovore za izvođenje radova za priključak na elektrodistributivnu mrežu.

Azra Hadžić pitanje je uputila premijeru Novaliću, kada planira donijeti izmjene i dopune Zakona o sukobu interesa u organima vlasti Federacije BiH, odnosno kada planira uskladiti postojeći zakon sa zakonom koji je donesen na državnom nivou?

Rasim Omerović uputio je pitanje Vladi Federacije BiH, a vezano za Zakon o plaćama i naknadama u organima vlasti Federacije BiH („Službene novine FBiH“ br. 45/10 i 111/12) a vezano za koeficijente koji se tiču pomoćnika načelnika u jedinicama lokalne samouprave.

Alma Kratina prvo pitanje koje je postavila vezano je za izmjenu i dopunu Zakona o zdravstvenom osiguranju, a odnosi se na neosiguranu djecu u dobi od 6 do 15 godina. Tražila je informacije od kantonalnih i Federalnog ministarstva zdravstva, a vezano za broj djece koja su neosigurana kako bi se imala jasna finansijska projekcija koliko je sredstava u pitanju, kako bi se riješio ovaj problem. Odgovor je dobila od Ministarstva zdravstva Bosansko-podrinjskog kantona i Posavskog kantona te odgovorom iz Bosansko-podrinjskog kantona nije zadovoljna. Traži informaciju koliki je broj djece starije od šest godina, koja nemaju status redovnog učenika, a koja su na osnovu Odluke od strane ministarstva uvedena u pravo na obavezno zdravstveno osiguranje u 2015. i 2016. godini.

Drugo pitanje uputila je kantonalnim administrativnim službama PIO i Federalnom zavodu PIO a također se odnosi na problematiku nasljeđivanja porodične penzije nakon smrti vanbračnog partnera. Budući da je ministar odgovorio da bi to bio udar na budžet, zamolila je Ured ombudsmena da poradi na ovom pitanju.

Šemsudin Kavazović pitanje je uputio Federalnom ministarstvu trgovine a vezano je za neusklađenost u prodaji sjemena i umjetnih gnojiva.

Ismet Kurić pitanje je uputio prema Vladi Federacije BiH a odnosi se na zaključak o zabrani zapošljavanja u javnom sektoru, agencijama javnim preduzećima i ustanovama. Pita da li je na snazi ili ne?

Prešlo se na izmjene i dopune dnevnog reda.

U raspravi niko nije učestvovao.

Na osnovu pojedinačnog zjašnjavanja, sa 50 glasova za, šest glasova protiv i uz 14 uzdražnih glasova, usvojen je sljedeći:

D N E V N I R E D

1. Prijedlog Zakona o izmjenama i dopunama Zakona o osiguranju od odgovornosti za motorna vozila i ostale odredbe o obaveznom osiguranju od odgovornosti,
2. Nacrt Zakona o obrtu i srodnim djelatnostima u Federaciji BiH,
3. Godišnji izvještaj o poslovanju Javnog preduzeća Željeznice Federacije BiH,
4. Izvještaj o radu Federalnog zavoda za zapošljavanje za 2016. godinu,
5. Godišnji finansijski izvještaj Federalnog fonda za pomoć nastradalim područjima od prirodne nesreće na teritoriji Federacije BiH za period 01.01.2016.-31.12.2016. godine,
6. Izvještaj o radu Fonda za profesionalnu rehabilitaciju i zapošljavanje osoba sa invaliditetom za 2016. godinu br. 01-02-4-2322/17 od 30.03.2017. i Izvještaj o izvršenju Finansijskog plana Fonda za profesionalnu rehabilitaciju i zapošljavanje osoba sa invaliditetom za 2016. godinu br. 01-02-4-2319/17 od 30.03.2017. godine,
7. Izvještaj o izvršenju Budžeta Federacije BiH za period od 01.januara, do 31. decembra 2016. godine,
8. Izvještaj o izvršenju Programa rada Agencije za reviziju privatizacije u Federaciji BiH za 2016. godinu,
9. Godišnji izvještaj o rezultatima aktivnosti Institucije ombudsmena za ljudska prava BiH za 2016. godinu,
10. Usaglasavanje tekstova zakona različito usvojenih u domovima Parlamenta FBiH,
11. Izbori i imenovanja.

1. Prijedlog Zakona o izmjenama i dopunama Zakona o osiguranju od odgovornosti za motorna vozila i ostale odredbe o obaveznom osiguranju od odgovornosti,

Prijedlog Zakona dostavila je Vlada Federacije BiH .

Prijedlog Zakona razmatrala su nadležna radna tijela i dostavila izvještaje.

Prijedlog ovog Zakona Predstavnički dom usvojio je na devetoj redovnoj sjednici po hitnom postupku, sa jednim izglasanim amandmanom.

Dom naroda je u prethodnom postupku odlučio da se prijedlog ovog Zakona razmatra u redovnoj proceduri, te je prihvatio nacrt ovog Zakona a nakon toga je Vlada Federacije BiH u parlamentarnu proceduru dostavila novi tekst prijedloga ovog Zakona.

Predstavnik Vlade dao je dodatno obrazloženje.

U raspravi su učestvovali: Jusuf Bubica i Mujo Hasić.

Predsjedavajući je pozvao zastupnike da se izjasne o Prijedlogu Zakona. Nakon glasanja, Safet Kešo u ime Kluba zastupnika SDA, izrazio je sumnju u rezultate glasanja, te na osnovu pojedinačnog izjašnjavanja nije usvojen Prijedlog Zakona o izmjenama i dopunama Zakona o osiguranju od odgovornosti za motorna vozila i ostale odredbe o obaveznom osiguranju od odgovornosti (46 glasova za, 21 glas protiv i uz dva uzdržana glasa).

2. Nacrt Zakona o obrtu i srodnim djelatnostima u Federaciji BiH

Nacrt Zakona dostavila je Vlada Federacije BiH .

Nacrt Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je ministar Amir Zukić.

U raspravi su učestvovali: Faruk Ćupina, Nasir Beganović, Almir Zulić, Mujo Hasić, Suzana Franjka Galić, Dževad Adžem, Jusuf Bubica, Jozo Bagarić i Azra Hadžić.

Sa 50 glasova za, sedam glasova protiv i uz 12 uzdržanih glasova, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o obrtu i srodnim djelatnostima u Federaciji BiH, te smatra da može poslužiti kao osnova za izradu prijedloga Zakona;

Zadužuje se Vlada Federacije BiH da prilikom izrade prijedloga Zakona uzme u obzir sve prijedloge, primjedbe i sugestije iznesene u raspravi, kao i one koje su dostavljene ili će biti dostavljene u pisanom obliku, te provede javnu raspravu od 60 dana.

Predsjedavajući je dao pauzu od 15 minuta, kako bi Komisija za izbor i imenovanja održala sjednicu.

3. Godišnji izvještaj o poslovanju Javnog preduzeća Željeznice Federacije BiH,

Generalni direktor JP Željeznice Federacije BiH dostavio je Godišnji izvještaj o poslovanju.

Izvještaj su razmatrala nadležna radna tijela i dostavila izvještaje.

Direktor Željeznica dao je dodatno obrazloženje.

U raspravi su učestvovali: Azra Hadžić, Nasir Beganović, Faruk Ćupina, Esad Bašagić, Enver Bijedić, Alma Kratina, Mira Ljubijankić, Dževad Adžem, Dževad Agić i Kasim Mulalić.

Sa 54 glasa za, osam glasova protiv i uz 12 uzdržanih glasova, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Izvještaj o radu i finansijskom poslovanju JP Željeznice Federacije BiH za 2015. godinu i Izvještaj o radu Nadzornog odbora za period 01.01.2015. do 31.12.2015. godine.

Predsjedavajući je pozvao zastupnike da se izjasne o zaključku Azre Hadžić.

Sa 51 glasom za, šest glasova protiv i uz 12 uzdržanih glasova, usvojen je sljedeći:

Z A K L J U Č A K

Obavezuje se Vlada FBiH da iz sredstava Budžeta FBiH za 2017. godinu finansira izgradnju električnog voda odnosno elektrifikaciju pruge na relaciji Bihać – Bosanska Krupa odnosno od Bihaća do entitetske linije sa Republikom Srpskom.

Zastupnik Enver Bijedić predložio je zaključke, koji nisu usvojeni (33 glasa za, 13 glasova protiv i uz 21 uzdržani glas).

Zastupnici Kamber, Bašagić i Mulalić predložili su zaključak.

Na osnovu pojedinačnog izjašnjavanja, sa 55 glasova za, dva glasa protiv i uz osam uzdražnih glasova, usvojen je sljedeći:

Z A K L J U Č A K

Zadužuje se Javno preduzeće Željeznice FBiH da hitno pristupi elektrifikaciji dijela unske pruge na relaciji Bihać – Bosanski Novi, te obezbijede željeznički putnički saobraćaj na relaciji Bihać – Sarajevo.

4. Izvještaj o radu Federalnog zavoda za zapošljavanje za 2016. godinu,

Izvještaj je dostavila Vlada Federacije BiH.

Izvještaj su razmatrala nadležna radna tijela i dostavila izvještaje.

U raspravi niko nije učestvovao.

Sa 50 glasova za, 14 glasova protiv i uz 14 uzdržanih glasova, Predstavnički dom prihvatio je Izvještaj o radu Federalnog zavoda za zapošljavanje za 2016. godinu.

5. Godišnji finansijski izvještaj Federalnog fonda za pomoć nastradalim područjima od prirodne nesreće na teritoriji Federacije BiH za period 01.01.2016.-31.12.2016. godine,

Godišnji finansijski izvještaj dostavila je Vlada Federacije BiH.

Izvještaj su razmatrala nadežna radna tijela i dostavial izvještaje.

U raspravi je učestvovao Blaž Župarić.

Predstavnički dom nije prihvatio zaključak o prihvatanju Godišnjeg finansijskog izvještaja Federalnog fonda za pomoć nastradalim područjima od prirodne nesreće na teritoriji Federacije BiH za period 01.01.2016.-31.12.2016. godine, (39 glasova za, 18 glasova protiv i uz šest uzdržanih glasova).

6. Izvještaj o radu Fonda za profesionalnu rehabilitaciju i zapošljavanje osoba sa invaliditetom za 2016. godinu br. 01-02-4-2322/17 od 30.03.2017. i Izvještaj o izvršenju Finansijskog plana Fonda za profesionalnu rehabilitaciju i zapošljavanje osoba sa invaliditetom za 2016. godinu br. 01-02-4-2319/17 od 30.03.2017. godine,

Izvještaj je dostavila Vlada Federacije BiH.

Izveštaj su razmatrala nadežna radna tijela i dostavila izvještaje.

U raspravi su učestvovali: Radoslav Luburić, Bajro Makić i direktor Fonda Ahmed Baljić.

Sa 58 glasova za, pet glasova protiv i uz sedam uzdržanih glasova, usvojen je Izvještaj o radu Fonda za profesionalnu rehabilitaciju i zapošljavanje osoba sa invaliditetom za 2016. godinu br. 01-02-4-2322/17 od 30.03.2017. i Izvještaj o izvršenju Finansijskog plana Fonda za profesionalnu rehabilitaciju i zapošljavanje osoba sa invaliditetom za 2016. godinu br. 01-02-4-2319/17 od 30.03.2017. godine.

7. Izvještaj o izvršenju Budžeta Federacije BiH za period od 01.januara, do 31. decembra 2016. godine,

Izvještaj je dostavila Vlada Federacije BiH.

Izvještaj su razmatrala nadežna radna tijela i dostavila izvještaje.

Uime Vlade Federacije BiH dodatno obazloženje dao je Mario Glibić.

U raspravi su učestvovali: Faruk Ćupina, Dževad Adžem, Elvir Karajbić i Jasmina Zubić.

Predstavnički dom nije prihvatio Izvještaj o izvršenju Budžeta Federacije BiH za period od 01.januara, do 31. decembra 2016. godine, (45 glasova za, 21 glasom protiv i uz sedam uzdržanih glasova).

Uime Kluba zastupnika HDZBiH Jozo Bagarić zatražio je kratku pauzu.

Nakon pauze kazao je da bi predsjednici klubova morali osigurati prisustvo svojih članova i odgovoran pristup profesionalnom zadatku zastupnika. Budući da nije osigurano prisustvo mnogih, smatra da bi bilo dobro prekinuti sjednicu, te je nastaviti sutra.

Predsjedavajući je prekinuo rad sjednice u 19.19.

* * *

NASTAVAK 21. REDOVNE SJEDNICE PREDSTAVNIČKOG DOMA PARLAMENTA FEDERACIJE BIH, održan 17.05.2017. godine

Sjednica je počela u 10.40.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, članove Vlade Federacije BiH, goste kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Azra Hadžiahmetović, Alma Arnaut, Ilhan Bušatlić, Emina Mutap, Zdravko Kuzman, Davor Vuletić i Elma Đogić

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

8. Izvještaj o izvršenju Programa rada Agencije za reviziju privatizacije u Federaciji BiH za 2016. godinu

Izvještaj je dostavila Vlada Federacije BiH.

Izveštaj su razmatrala nadežna radna tijela i dostavila izvještaje.

Predstavnik Agencije Amer Bekrić dao je dodatno obrazloženje.

U raspravi su učestvovali: Jasmin Kadić, Almir Zulić, Jasmina Zubić, Faruk Ćupina, Jozo Bagarić, Vjekoslav Bakula, Mahir Mešalić, Munib Jusufović, Dževad Adžem, Salmir Kaplan, Jusuf Bubica, Nasir Beganović, Ismet Osmanović i Jasmin Kadić.

Sa 54 glasa za, 14 glasova protiv i uz pet uzdržanih glasova Predstavnički dom je zaključkom prihvatio Izvještaj o izvršenju Programa rada Agencije za reviziju privatizacije u Federaciji BiH za 2016. godinu.

9. Godišnji izvještaj o rezultatima aktivnosti Institucije ombudsmena za ljudska prava BiH za 2016. godinu

Izvještaj je dostavila Vlada Federacije BiH.

Izveštaj su razmatrala nadežna radna tijela i dostavila izvještaje.

U ime Komisije za zaštitu ljudskih prava i sloboda obrazlagao je Munib Jusufović.

U raspravi su učestvovali: Jasmina Zubić, Jasna Duraković Hadžiomerović, Safet Kešo i Alma Kratina.

Predstavnički dom primio je k znanju Godišnji izvještaj o rezultatima aktivnosti Institucije ombudsmena za ljudska prava BiH za 2016. godinu, sa sljedećim zaključkom Komisije za ljudska prava i slobode: Razmatrajući sa aspekta postizanja boljih rezultata i poboljšanja stanja ljudskih prava, predlažemo da Predstavnički dom Parlamenta Federacije BiH zaduži Vladu Federacije BiH da svaki zakon koji pusti u proceduru dostavlja i Instituciji Ombudsmena za ljudska prava u BiH, kako bi proanalizirali njihovu usklađenost sa Evropskim konvencijama za zaštitu ljudskih prava i sloboda.

Zaključak koji je predložila Jasmina Zubić u vezi ove tačke dnevnog reda nije usvojen (42 glasa za, 11 glasova protiv i uz 14 uzdržanih glasova).

10. Usaglasavanje tekstova zakona različito usvojenih u domovima Parlamenta Federacije BiH,

Prijedlog Zakona o Agenciji za bankarstvo Federacije BiH

Zajednička komisija za usaglašavanje različito usvojenih tekstova zakona u domovima Parlamenta Federacije BiH razmatrala je Prijedlog Zakona o Agenciji za bankarstvo Federacije BiH i utvrdila prijedlog za rješenje spornog pitanja.

U ime Zajedničke komisije dodatno obrazloženje dao je Dario Knezović.

U raspravi niko nije učestvovao.

Predsjedavajući je pozvao zastupnike da se izjasne o prijedlogu Zajedničke komisije, da Predstavnički dom odustane od svoja dva izglasana amandmana, odnosno da usvoji tekst Prijedloga Zakona o Agenciji za bankarstvo Federacije BiH u tekstu kako ga je usvojio Dom naroda Parlamenta Federacije BiH. Sa 50 glasova za, 15 glasova protiv i uz 11 uzdržanih glasova, usvojen je Prijedlog Zakona o Agenciji za bankarstvo Federacije BiH u tekstu kako ga je predložio Dom naroda.

11. Izbori i imenovanja

Komisija za izbor i imenovanja razmatrala je prijedlog vezan za promjenu u Administrativnoj komisiji.

U ime Administrativne komisije dodatno obrazloženje dao je Mladen Bošković.

U raspravi je učestvovao Mahir Mešalić.

Predsjedavajući je pozvao zastupnike da se izjasne o Odluci o razrješenju i izboru predsjednika, zamjenika predsjednika i pojedinih članova u određenim radnim tijelima Predstavničkog doma Parlamenta Federacije BiH, kojim bi se za predsjednika Administrativne komisije izabrao Mensud Borović, koji je član ove Komisije umjesto dosadašnjeg predsjednika Amira Zukića, a da zastupnik Zukić i dalje ostane član ove Komisije.

Predsjedavajući je pozvao zastupnike da se izjasne o ovom prijedlogu. Nakon glasanja, u ime Kluba zastupnika HDZBiH, Jozo Bagarić zatražio je pojedinačno izjašnjavaње. Na osnovu pojedinačnog izjašnjavaња, sa 46 glasova za, četiri glasa protiv i uz 19 uzdržanih glasova prijedlog nije usvojen.

Predsjedavajući je zaključio rad 21. redovne sjednice u 12.24.

Transkript i prijepis transkripta sjednice čine sastavni dio Zapisnika.

v. d. SEKRETARA
PREDSTAVNIČKOG DOMA
PARLAMENTA FEDERACIJE BIH

Stela Ibrović

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH

Edin Mušić

